



Dr Gump^{uff}gump_{ab}bus

Syt bald zwai Joor kenne z Basel Turischte d Stadt besichtige in ere knallrote Kische. Hop-on Hop-off haisst dä Bus, und das isch so vyyl wie Gumpuffgumpabbus uff Baseldytsch.

Immen e waansinns Aafall vo Kreativiteet, wo unseri Clique jo eppenemool het, hän s gfunde dä Bus wänn mer als Sujet ha. S Dumm isch das hän s quasi s letscht Joor scho gha.

Sällmool sin d Turischte zwoor mit em Schiff aakoo aber denn hän si juschtemänt dä Gumpibus gno. Dr Zeedel het denn son e Bustur beschriibe und warum s sich loont drey Dääg in Basel z blyybe.

Fir dr Schryberling isch das nit zem Lache denn uss déjà-vu kasch kai neie Zeedel mache. Doch statt lamentiere und blinzle versuecht er trotzdem e baar Värslü z brinzle.

Bim Tinguelybrunne am Stainebürg waarte e Hampfle Turischte wo sone Stadttur wänn staarte. Fir zwai Dozed Stai kasch dr das Vergniege kaufe derfir wirsch chauffiert und muesch nit laufe.

Im Bus het s kai Guide und das isch schaade, nur en iPad und en App wo d uff s Händy muesch laade. E Dringggäldkässeli het s trotzdem au, nur fir was de no sottsch zaale das weiss kai Sau.

Denn goot s loos und jetz legsch d Kopfheerer aa. "Welcome, Bienvenue, Wir heissen Sie. – blaaah Dr Bus duet au an vyylen Ort stoppe wo me ka uuse und im näggschte yyne hoppe."

Bim Spaalebürg Halt stygge no zwai Persoone yy. Dr aint sait „dasch jetz e leerryche Bummel gsi. Am Märblatt, ha mer lo saage, im rot/griene Huus inne hoggi statt em e Griessaugust jetz en Augustine.“

Die ander, en uffdonnereti Gumsle vo Wält, aagschirrt immene bluemig bestiggte Zält, kämpft sich zer hinterschte Raaie duure und ruspetiert „äxgyysi“ mit ere grosse Schn....

Am Santihan Rhywääg stygge no mee Lyt yy. Dr Georges mit Familie vo dr Normandie, dr Lucky mit dr Erica, die kemmen us Amerika, und denn no dr Seppi vo Hölschte, dä hoggt zvorderscht zem Georges, „do isch s am töllschte“.

Im Rhyhaafe gits e Fotistop fir die wo nit pfuuse. Wo dr Chauffeur froggt „wott sunscht no ebber uuse?“ duet die barogg beroggti Tschättere "#MeToo" vo hindefiire schnättere.

Wyter goot d Rais zur Dalbe Fääri am Rhy. Wär wott styggt vom Bus uff d Fääri und ääne wiider yy. "Do isch s scheen; wär I ryych wurd i blyybe" maint dr Seppi und dr Georges dit "mais oui, je suis presque Bebbi".

Dr Bus haltet denn au bim Kunschtmuseum aa. Dr Lucky gump uuse mit dr Erika und was die baide vo deert aa erlääbe stoot im letschtjeerige Zeedel vo de Kloschterräbe.

Bsuech is au uff www.kloschterraebe.ch

D Ladäärne-Uusstellig uff em Minschterplatz und D Waage- und Reggwisyte-Uusstellig bi dr Kasäärne sin vom Määntig znacht bis am Mittwoch demoorge. Deert und an de 3 Verkaufsständ (CINS) in dr Stadt ka men au alli Zeedel und Schnitzelbängg, d Blaggette und d Rädäbäng kaufe.

D Zeedelläasete isch am Sunntig no dr Fasnacht 2018 am 25. Februar vom Fimfi bis am Siibeni zoobe im Käller vo dr Baseldytsche Biini (im Lohnhof 4). D Foyer-Bar isch vom Vieri ewägg offe.